

Berlindung daripada Bala

Daripada Abu Hurairah RA, katanya Nabi SAW bersabda:

تَعَوَّذُوا بِاللَّهِ مِنْ جَهْدِ الْبَلَاءِ، وَدَرَكِ الشَّقَاءِ، وَسُوءِ الْقَضَاءِ، وَشِئَانَةِ الْأَعْدَاءِ

Maksudnya: "Berlindunglah kamu dengan Allah daripada bala yang sukar, kejahatan yang melampau, qadak yang jahat dan cacian musuh."

Riwayat al-Bukhari dalam *al-Sahih* (11/5221) no. (6616)
dan Muslim dalam *al-Sahih* (4/ 2080) no. (2702)

Pedoman dan Iktibar Hadis

Antaranya:

1. Dalam merentasi kehidupan yang penuh pancaroba, sudah menjadi asam garam hidup terdapatnya dua warna. Kadang-kadang dengan kegembiraan dan kadang-kadang dengan kedukacitaan. Begitu juga kaya boleh menjengah kehidupan seseorang dan kefakiran boleh bertapak menggantikan kaya tadi.
2. Musuh-musuh boleh jadi mengambil kesempatan untuk menyalakan seseorang dari persaingan yang pada asalnya penuh dengan sihat tetapi berkesudahan dengan dendam kesumat serta tindakan yang melampaui norma-norma kehidupan, sehingga mengakibatkan natijah yang amat malang dan kadang-kadang membawa kepada kesengsaraan. Lebih malang lagi tiadanya sokongan daripada pembantu yang setia serta sahabat sejati. Akhirnya ia menjadikan kehidupan yang amat sengsara. Tiada kawan dan pembantu yang setia, sebaliknya umpatan dan kejian sentiasa bermain di bibir musuh-musuhnya.
3. Rasulullah SAW yang memandu kehidupan manusia, mengajar kepada kita supaya sentiasa munajat, berdoa dan memohon kepada yang Maha Esa ketika senang atau susah supaya bantuan Allah sentiasa bersama kita.

4. Dalam hadis ini, Rasulullah SAW menyebut supaya kita bermohon daripada segala bala yang boleh memudaratkan kehidupan kita. Ini menandakan ranjau-ranjau kehidupan dan duri-durinya amat berbisa yang boleh menikam seterusnya memusnahkan sesebuah kehidupan. Ketika itu yang bertapak lebih kepada penderitaan, kesengsaraan dan juga sebagai manusia yang benar-benar tidak membawa sebarang erti kepada dirinya sendiri, apatah lagi kepada masyarakat dan umat amnya.
5. Dengan sentiasa berdoa yang menjadi senjata ampuh bagi orang yang beriman sudah pasti boleh merasai betapa hampirnya pertolongan Allah untuk hamba-hamba-Nya yang soleh, apatah lagi ketika munajat tersebut dipohon kepadanya di keheningan malam dan juga fajar hampir menyinsing kerana Allah SWT amat memakbulkan doa hamba-Nya yang menadah tangan bermunajat kepada-Nya saat mata-mata manusia sedang diulit mimpi tetapi dengan penuh pengharapan dia bangkit meninggalkan keseronokan tidur semata-mata takut dan harap kepada Ilahi. Justeru amat wajar kita melazimi doa seperti yang diperintahkan oleh Rasulullah SAW.

Mutiara Hikmah

- ❖ **Hatim al-Zahid berkata:** Empat perkara, tidak difahami nilainya kecuali oleh empat:
 - i. Nilai muda tidak diketahui kecuali oleh orang yang telah tua.
 - ii. Nilai kesihatan tidak diketahui kecuali oleh orang yang sakit.
 - iii. Nilai sejahtera (aman) tidak diketahui kecuali oleh orang yang terkena bala.
 - iv. Nilai hidup tidak diketahui kecuali oleh yang sudah mati.
- ❖ **Pujangga berkata:** Sejauh mana keinginan, kesungguhan dan kesabaran anda, maka sejarah anda akan menuliskannya. Kemuliaan itu tidak diberikan secara percuma. Kemuliaan itu didapati dengan kesungguhan dan diperolehi dengan pengorbanan.

Kisah Teladan

Athiyah bin Qais berkata: Ka'ab menderita sakit dan dijenguk oleh sekelompok penduduk Damsyik, mereka berkata: Bagaimana khabarmu wahai Abu Ishaq? Dia menjawab: Baik-baik, inilah jasad yang diambil dosanya.

Jika Rabbnya berkehendak, Dia akan menyeksanya dan jika berkehendak, Dia akan merahmatinya, dan jika membangkitkan, Dia akan membangkitkannya sebagai makhluk baru yang tidak berdosa. Sebahagian salaf berkata: Kalau tidak ada musibah dunia, nescaya kita akan mendatangi akhirat dalam keadaan rugi.

Ma'ruf al-Karkhi Rahimahullah berkata: Sesungguhnya Allah menguji hamba-Nya yang mukmin dengan sakit dan kelaparan, lalu dia mengadu kepada sahabatanya, maka Allah berfirman kepadanya: Demi kemuliaan dan keagungan-Ku, Aku tidak menguji dengan kelaparan kecuali untuk menyucikanmu dari dosa-dosa, maka janganlah mengadukan diri-Ku.